

DOMENIE XVII «VIE PAL AN»

Jutoris pe liturgjie

Domenie, ai 26 di Lui dal 2020

Al ore Gjesù ur vierzè la ment par lâ a font des Scrituris (Lc. 24, 45)

Vite - Bibie - Popul

pre Antoni Beline e une sô opinion di ûr - par fânus rifleti vuê

"Chi si ferma è perduto!"

O ài ancjemò sot dai vòi ce ch'a vevin scrit sun cualchi vecjo mûr dai nestris paîs: "Chi si ferma è perduto!". E jere, mi pâr, une des peraulis "fatâls" dal Duce e si riferive a la vuere, cuant che un popul nol podeve mai permetisi il lusso di distirâsi a polysâ.

Stant che Diu al à vût profetât ancje midiant de musse di Balaam (Nm 22, 22-35) no viôt parcè che no si podarès doprâ chestis peraulis tal lôr sens plui profont e sapienziâl, par chê grande "campagne militâr" che e je la vite. No si pò e no si à di fermâsi mai. Al è par altri chel che nus fâs capî une vore clâr la Bibie.

O vin viodût che la Bibie e je un libri di grande tension, tal sens che la strade dal om e scomence cu la crezion ma e va indenant fintremai che l'umanitât no rivarà complete e compate te gnoove dimension, di là di cheste tiere e di chest cîl. Si pò dî duncje che dute la Bibie, de prime a la ultime rie, e je une parabule dal grant viaç da l'umanitât viers de plenece.

Se si gjave dal Libri sant cheste dimension escatologjiche, si gjave une clâf di fonde par une leture corete. Come che se o gjavìn de nestre vite une tension escatologjiche no sin plui in sintonie cul progetto di Diu come che i à parût di rivelânsual.

L'om e il popul, inte Bibie, no son mai sentâts, mai sigûrs, ma simpri in pîts, simpri in scolte, simpri in marce, simpri in ricerche di un alc di plui perfet.

* * *

Te messe di cheste domenie par trê voltis il Signôr nus vise che il ream dai cîi al è compagn di un tesaur... di une perle di grant valôr... di une rêt butade tal mât... e al conclût:

Vêso capit dut?

Cui sa? Forzit in chestis zornadis di Coronavirus e di pandemie, di avignî insigûr e di debits oceanics, il tesaur e je la dotazion di 750 miliarts cjatade tal cjamp de UE a condizions ben precisis; "per tutelare, a disin, la dignità dell'Italia"; la perle e varès podût sedi il document de Congregazion pal clericât: "Battesimi, funerali e matrimoni celebrati da laici" che però tune riforme indispensabil dai sacraments al è come une ejane rote che il Signôr te sô misericordie no le crevarà (Mt 12, 20). Regulis cussì a jerin al ordin dal dî in Americhe latine agnorum indaûr. Proibidis; e che cumò par nécessitat a tornin a vignî für.

Pe rêt li che vuê al è improibît cjapâ ogni sorte di pes baste pensâ ai ostacui continuis che a incuintri i documents di pape Francesc. Fra i plui recentis: la esortazion Querida Amazonia.

Cjalantsi atôr, al è pôc ce sielzi: il vêr tesaur - perle - rêt ancje in zornade di vuê al reste: che o vedis la possibilât di capî, insieme cun ducj i sants, il sens de largjece, de lungjece, de altece e de profonditât, ven a stâi di cognossi l'amôr di Crist, che al va plui in là di ogni altre cognossince, e cussì si colmedis di dute la plenece di Diu (Ef 3,18-19). In chescj versets, lis peraulis a son masse altis e penzis par noaltris, ma a puedin deventâ semplicis, a la nestre puartade: baste sostâ a

imparâ de vite semplice, umane-divine di Gjesù contade tai vanzei e metisi in companie di cualchi tribulât. Te vite di Crist e dal ultim, pal cristian, a son platâts e palesâts i grancj tesaurs che o vin dibisugne.

Tesaur - perle - rêt... *a son chês personis - juscj sants e piçui - di cualsisedi civiltât e religion che praticant, ancie cence savê, lis beatitudinis di Crist, a tegnин in pîts il mont di vuê e a parecjin il mont di doman.*

Tesaur - perle - rêt... *al è l'amôr dal prossim, par vie che te regule d'aur il Signôr nus dîs:* Dut ce che o vês gust che i oms us fasin, faseitlu ancie vualtris a lôr. Di fat cheste e je la leç e i profetis (*Mt 7, 12*).

Antifone di jentrade

Sal 67,6-7.36

Chest al è Diu te sô sante cjase.

Diu al torne a menâ a cjase chei che si jerin pierdûts, al è lui che i da al popul fuarce e vigorie.

Colete

Diu, protetôr di chei che in te a sperin e che cence di te nol è nuie di valit e di sant, multipliche sore di nô il to boncûr par che, tignûts sù e guidâts di te, o imparin a doprâ lis robis ch'a passin in mût di restâ plui tacâts a di chês ch'a durin par simpri. Pal nestri Signôr Gjesù Crist to Fi, ch'al è Diu e cun te al vîf e al regne dutune cul Spirtu Sant, par ducj i secui dai secui.

PRIME LETURE

1 Re 3,5.7-12

Tu âs domandât par te di rivâ a capî.

La istituzion glesiasistiche e à estreme dibisugne dal spirit e de preiere dal zovin re Salomon (secul X p.d.C.). L'autoritarism clericâl al à devastade la glesie fin chê altre dì e al à puartât dams pençs che o stin acjemò paiant salâts.

Signôr da ai nestris sorestanti di rivâ a disservi cun sintiment ce ch'al è just, di olmâ i segnâi dai virus e des catedrâls che a brusin e di vê un cûr uman ch'al sepi capî e judicâ.

Dal prin libri dai Rêts

In chei dîs il Signôr i comparì in sium a Salomon vie pe gnot. Diu al disè: «Domande ce ch'o ai di dâti». E Salomon al disè: «Signôr gno Diu, tu âs metût re il to famei impen di gno pari David e jo o soi masse zovin e no sai ancjemò fâ di sorestant. Il to famei al è framieç dal popul che tu âs sielt, un stragjo di int, tante che no si rive ni a contâle ni a savê trophe ch'e je. Dai al to famei un cûr plen di sintiment par rezi il to popul, par disservi jenfri il ben e il mâl, parcè che cui podaressiâl rezi il to popul ch'al è tant grant?». I plasè al Signôr che Salomon al ves fate cheste domande e Diu i disè: «Za che tu âs domandât chest, che no tu âs domandât par te ni vite lungje, ni ricjece, ni la muart dai tiei nemîs, ma che tu âs domandât par te di rivâ a disservi cun sintiment ce ch'al è just, ve che ti fâs ce che tu âs dit: ti doi un cûr ch'al sepi capî e judicâ come che no lu à vût nissun prime di te e nissun no lu varà daûr di te».

Peraule di Diu.

SALM RESPONSORIAL

dal Salm 118

Mi soi dit: il distin che mi tocje al è di tignî cont des peraulis dal Signôr: *mi soi dit, ma o ai ancie dit dut, al è dit dut.*

La leç de tô bocje, Signôr, plui che no miârs di tocs di arint e di aur.

Il salm tal so origjinâl al cjante - tune litanie di 1250 peraulis e 176 versets - la sapience di vite che al piu israelit i ven de meditazion su la peraule di Diu.

Blaise Pascal (1623 - 1662) lu preave ogni dì.

R. La tô leç, Signôr, e je la mê gjonde.

Se cjantât: Il cjant dai salms responsoriâi, p. 67.

Mi soi dit: il distin che mi tocje
al è di tignî cont des peraulis dal Signôr.
E je un ben par me la leç de tô bocje,
plui che no miârs di tocs di arint e di aur. **R.**

Ch'al vegni a dâmi confuart il to boncûr,
seont ce che tu i âs imprometût al to famei.
Ch'al rivi chi di me il to boncûr par che o vedi vite,
parcè che la tô leç e je la mê contentece. **R.**

Par chel jo i ten ai tiei ordins
plui che no al aur, al aur plui fin ch'al sedi.
Par chel jo o stimi juscj ducj i tiei comants,
cu la cuâl che no pues nulî nissun troi di bausie. **R.**

A son un spetacul i tiei ordins;
par chel la mê anime ju met in vore.
E da lûs la rivelazion des tôs peraulis;
ur da sintiment ai sempliçs. **R.**

SECONDE LETURE

Rm 8,28-30

Nus à predistinâts a jessi compagns dal stamp di so Fi.

Par podê voléi ben a san Pauli o vin di ricevilu cuntun cûr sempliç, cence tantis pratesis; dome cussì la sô masse dificile teologie e pues donânum lûs. Tocje sostâ forzit tune sole sô peraule; cirî la sostance dal mes cence spiticâsi masse.

Al è ancie il câs de leture di vuê.

Dal sigûr vuê nus turbe chel predestinâts, ma continuùn: a jessi compagns dal stamp di so Fi. Za chest sclariment nus baste, parcè che o savin ce bon pan, di ce paste umane e divine che al è Gjesù. Nol è un impegn pesant sedi predestinâts a cjalâ a lui par mudâsi tal so amôr; al è invezit gracie che nus rint lisêrs e nus madure come personis e fîs di Diu tal temp.

De letare di san Pauli apuestul ai Romans

Fradis, o savin che, par chei che i vuelin ben a Diu, dut al jude a lâ a finîle in ben, par chei che a son stâts clamâts seont il plan di Diu. Parcè che chei che za prime al veve cognossût, ju à ancie predistinâts a jessi compagns dal stamp di so Fi, par ch'al fos il fi primarûl framieç di tancj fradis. Chei po ch'al à predistinâts, ju à ancie clamâts; chei ch'al à clamâts, ju à ancie justificâts; chei ch'al à justificâts, ju à ancie glorificâts.

Peraule di Diu.

CJANT AL VANZELI

cf. Mt 11,25

R. Aleluia, aleluia.

Benedet sêstu tu, Pari,
Signôr dal cîl e de tiere,
parcè che ai piçui tu âs palesât
i misteris dal ream dai cîi.

R. Aleluia.

VANZELI

Al vent dut ce ch' al à e al compre chel cjamp.

Mt 13,44-52

Tal mont l'un par cent de popolazion al streç in pugn il novantenûf par cent des ricjecis, intant che il novantenûf par cent de popolazion al scuen stâ dentri in chel un par cent des risorsis che a restin. Si podarès dî che il ream di Diu al è lontan de tiere miârs e miârs - milions ? - di agns come chei de lûs.

Però bisugne anche dî: te parabule dal vanzeli un om il tesaur lu cjate: e al vuîl dî che anche vuê personis a stan sforçiant; un marcjadant si intive tune perle: duncje indi è oms e feminis che a talpinin a cirî; une rêt butade tal mât: cualchidun si da da fâ anche su l'aghe ... parcè che o ai sparagnât par me sietmil oms al dîs il Signôr e vualtris no vês di vê pôre (Rm 11, 4; Mt 10,26).

Il Signôr vuê nus domande: Vêso capît dut? E al spiete une nestre respuesta. Ai siei temps chei che lu scoltavin i àn rispuidût: «Sì».

Dal vanzeli seont Matieu

In chê volte, Gjesù al disè a la fole: «Il ream dai cîi al è compagn di un tesaur platât tal cjamp. Un om lu cjate e lu torne a platâ; po si 'nt va dut content, al vent dut ce ch' al à e al compre chel cjamp. Ancjemò: il ream dai cîi al è compagn di un marcjadant ch' al va a cirî perlis di chê plui bielis. Intivât tune perle di grant valôr, al va, al vent dut ce ch' al à e le compre.

Ancjemò: il ream dai cîi al è compagn di une rêt butade tal mât, ch' e à cjapât sù ogni sorte di pes. Cuant ch' e je incolme, i pescjadôrs le tirin su la rive e, sentâts, a metin di bande i pes bogns intes cestis e a butin vie chei scarts. Cussì al sucederà a la fin dal mont: a vignaran i agnui e a dividaran i triscj dai bogns e ju sgnacaran te fornâs infogade. Li al sarà dut un vaî e un crustâ di dincj.

Vêso capît dut?». I rispuindin: «Sì». Lui ur disè: «Par chest ogni scruturist istruît tal ream dai cîi al è compagn di un pari di famee ch' al rive a tirâ für dal so tesaur robis gnovis e antighis».

Peraule dal Signôr.

Su lis uiftis

Acete, Signôr, i regâi
che ti presentin pe tô gjenerositat
par che chescj misteris sants, cu la virtût de tô gracie,
a santifichin i dîs di cheste nestre vite
e nus menin a la gjonde eterne.
Par Crist nestri Signôr.

Sal 102,2

Antifone a la comunon
Benedis, anime mê, il Signôr,
e no sta lassâ in dismentie nissun dai siei plasê.

O ben: Mt 5,7-8

Furtunâts chei ch' a àn misericordie, parcè che a cjataran misericordie.
Furtunâts i monts di cûr, parcè che a viodaran Diu.

Daspò de comunon

O vin gjoldût, Signôr, il sacrament dal cîl,
memorie eterne de passion di to Fi;
fâs, par plasê, ch' al zovi pe nestre salvece
chest regâl che nus à dât tal so boncûr cence fin.
Lui ch' al vîf e al regne tai secui dai secui.

* * *

Sante messe e Eucaristie, rîts, preieris, cjants: Hosanna pp. 34 - 119.

* * *

Il tesaur dal Ream dai cîi

I cristiani dovrebbero ritenere, con maggiore chiarezza, vigore e fermezza, che la teologia cristiana non ci ha fatto capire bene una cosa fondamentale: la chiesa ha dato (e continua a dare) più importanza alla Religione che al Vangelo.

Non dimentichiamo che è stata la religione a uccidere Gesù. Perché Gesù ha dato più importanza all' umano che al religioso. Nella teologia narrativa dei vangeli ciò che è più chiaro e più evidente, è questo: quando Gesù ha affrontato il dilemma di porre rimedio alla sofferenza umana o di sottomettersi alla osservanza religiosa non ha esitato un momento, la prima cosa è stata sempre dare la vita, alleviare il dolore, restituire dignità e diritti agli esseri umani.

La cosa è chiara: troviamo Dio nella misura in cui diventiamo profondamente umani. Solo allora possiamo essere veramente divini.

Già agli albori del Cristianesimo un seguace di Gesù scriveva: Religione pura e senza macchia davanti a Dio Padre è questa: visitare gli orfani e le vedove nelle sofferenze e non lasciarsi contaminare da questo mondo (Gc 1, 27).

Dice S. Paolo: Qualsiasi altro comandamento si ricapitola in questa parola: Amerai il tuo prossimo come te stesso (Rm 13, 9).

Il compito enorme di testimoniare l'amore del prossimo in un mondo di egoismo e di ingiustizia terrà pienamente occupati i cristiani, se lo vorranno, per i prossimi mille anni.

José Maria Vigil

* * *

* I cjants, salms e cjantadis a vegnir ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.

* Il cjant dai salms resposoriâi, Ed. Glesie Furlane, 2012.

* 50 corâi de cristianitat todescje voltâts par furlan, ed. Glesie Furlane, 2016.

* Il libri des riflessions di pre Antoni al è: pre Antoni Beline, Furtunât il popul che al è il Signôr il so Diu - par une leture sapienziâl de Bibie, Edizion "La Patrie dal Friûl", 1991.

* Par domandâ chescj libris scrivêt a info@glesiefurlane.org